

***Uunga siunnersuut: Greenland Oil Spill Response A/S pillugu Inatsisartut inatsisaat nr.
xx. xx 2012-imeersoq
(Naalakkersuisunit saqqummiunneqartoq)***

pillugu

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Inuussutissarsiornermut Ataatsimiititaliap suliarinninnermini kingullermik ukuningga inuttaqarpoq:

Inatsisartunut ilaasortaq Naaja Nathanielsen, Inuit Ataqtigiit, siulittaasoq

Inatsisartunut ilaasortaq Andreas Uldum, Demokraatit, siulittaasup tullia

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinnguaq Olsen, Siumut

Inatsisartunut ilaasortaq Knud Fleischer, Kattusseqatigiit Partiiat

Inatsisartunut ilaasortaq Aqqaluaq B. Egede, Inuit Ataqtigiit

Inatsisartunut ilaasortaq Karl Lyberth, Siumut

Siunnersuut UPA 2012-imi siullermeerneqareermat ataatsimiititaliap misissorpaa matumuunalu isumaliutigisani Inatsisartunit suliarineqartussanngorlugit saqqummiullugit.

1. Siunnersuutip imarisaa siunertaalu

Oliemik mingutsitsisoqartillugu upalungaarsimanissamut ingerlatseqatigiiffimmik Greenland Oil Spill Response A/S-imik taaguutilimmik, matuma kingorna GOSR-mik taagorneqartumik Kalaallillu Nunaanni oliemik mingutsitsisoqartillugu upalungaarsimanissamut ingerlatseqatigiiffimmik pilersitsinermi siuttuusussamik, Namminersorlutik Oqartussanit pigineqartumik Naalakkersuisut inatsisissatut siunnersuut una aqutigalugu pilersitsinissaq kissaatigaat. Ingerlatseqatigiiffik aktiaateqarluni ingerlatseqatigiiffittut pilersinneqassasoq siunnersuutigineqarpoq. Siunnersuummut ilaatigut tunngaviuvoq IBA pillugu isumaqatigiissuteqarnermut atatillugu oliemik mingutsitsisoqartillugu salinermi atortunik 20 millioninik nalilinnik, Cairn Energymit Namminersorlutik Oqartussanut 2010-imi tunniussineq.

1.1 Greenland Oil Spill Response A/S-imik pilersitsinerup siunertaa pingaarneq

Ingerlatseqatigiiffinnut oliemik ikummatissanillu allanik misissuineramik imaluunniit qalluineramik Kalaallit Nunaanni ingerlatsisunut oliemik mingutsitsisoqartillugu upalungaarsimanissamut atortunik pilersuinissaq GOSR-mik pilersitsinerimi pingaarnertut anguniagaavoq. Eqqarsaataavoq oliemik mingutsitsisoqarnerani akiuinissamut aammalu oliemik mingutsitsisoqarnerata kingorna avatangiisinik saliinissamut ingerlatseqatigiiffiup kiffartuussinerimi ilaatut neqerooruteqarsinnaanissaa. Ataatsimiititaliap paasivaa kiffartuussinerit ingerlatseqatigiiffimmit neqeroorutigineqarsinnaasut, oliemik mingutsitsisoqartillugu saliiinermi upalungaarsimanissamut atortut nunat tamalaat ingerlatseqatigiiffiunik suleqateqarneq aqquutigalugu misilittakkat ilisimalikkallu ingerlatseqatigiiffimmi pigineqalernerat ilutigalugu amerlisikkiartuaarneqassasut, taamaaliornikkut nunani tamalaani piumasaqaatit atuuttut naapertorlugit kiffartuussinissamik neqerooruteqarsinnaasunngorlugu GOSR oliemik mingutsitsisoqartillugu saliiinermi upalungaarsimanissamut atortunik ingerlatseqatigiiffittut tamakkiisumik inerisarneqarsimasutut annertusaasinnaaqullugu. Tassunga atatillugu GOSR-p Global Response Networkimut, oliemik mingutsitsisoqartillugu upalungaarsimanissamut atortunik ingerlatseqatigiiffiit nunarsuarmi anginerit arfineq marluk akornanni suleqatigiiffiusumut ilanngunnissaa naatsorsuutigineqarpoq.

1.2 Ingerlatseqatigiiffiup ingerlanneqarnerani tunngavik

Aningaasaqarnikkut tunngavik GOSR-p ingerlatsinermini aallaavissaa inatsimmi § 8-imi allasimavoq, tassani allasimalluni piginnaatitsissummik pigisaqartoq, aatsitassanut inatsit malillugu akuersissummik tunineqarsimasoq, piginneqatigiiffiup kiffartuussinissamik isumaginninnissaa pillugu isumaqatigiissuteqassasoq eqquutsitsillunilu, kiffartuussinerit teknikkikkut GOSR-p tunniussinnaasai naapertorlugit aammalu ingerlatseqatigiiffiup kiffartuussinera teknikkikkut taamatullu aningaasaqarnikkut unammillersinnaassuseqarpata. Pisumili aalajangersimasumi GOSR-p kiffartuussineri teknikkikkut taamatullu aningaasaqarnikkut unammillersinnaassuseqanngippata tamatuma uppernarsarnissaa piginnaatitsissummik piginnittup pisussaaffigaa.

Piginnaatitsissummik pigisaqartunut isumaqatigiissut siuliani taaneqartoq aalajangersimasumik akiliuteqarnissamik aqqissuussinermit aammalu ingerlataqarneq apeqqutaatillugu isertitanit katitigaavoq. Aalajangersimasumik akiliuteqarnissamik aqqissuussinikkut piffissani oliesiornermik ingerlatseqatigiiffiit Kalaallit Nunaanni ingerlataqartut ingerlatai appasissuutillugit GOSR-p aalajangersimasumik isertitaqarnissaa qulakkeerneqassaaq. Ingerlatat apeqqutaatillugit kiffartuussinerit tassaapput sullissinermut

aalajangersimasumut GOSR-p oliesiornermik ingerlatseqatigiiffimmik sullissineranut akiliuteqartitsisarnissaq. Tamanna assersuutigalugu tassaasinnaavoq, oliemik mingutsitsisoqartillugu upalungaarsimanissamut atortunik attartortitsineq.

Oliesiornermik ingerlatseqatigiiffinnik kiffartuussinissamik isumaqatigiissutigineqartut niueqatigiinnermi piumasaqaatit naapertorlugit isumaqatigiissutigineqartassasut eqqarsaataavoq. GOSR-lli najukkani oliemik mingutsitsisoqartillugu upalungaarsimanissamut atortunik pilersitseqataanissaa inerisaaqataanissaa tunngavissaatillugu akit piumasaqaatillu isumaqatigiissutigineqassasut siunnersuummut nalinginnaasumik nassuiaatini allassimavoq. Aningaasartuutit tamatuma nassatarisai oliesiornermik ingerlatseqatigiiffiit GOSR-p kiffartuussinineranut akiliutissaannut ilaapput. Taamaattorli § 4-imi allassimavoq, aktiaatit 2/3-
lii tunineqarsimappata § 8-imi aamma § 9-mi aalajangersakkat, piginnaatitsissummik pigisaqartup GOSR-mik isumaqatigiissuteqarnissamik tamatumunngalu akiliuteqarnissamik pisussaaffiliinik maleruagassiisut, atorunnaassasut. Taamaattumillu ilimagisariaqarpoq GOSR piffissap taamaalinerani aningaasaqarnikkut imminut napatissinnaalereersimassasoq, taamaalillunilu inuussutissarsiummik aallarnisaanermi aalajangersakkatigut marluusutigut toqqaannangikkaluamik ikiorserneqarnissaa pisariaqassanani.

1.3 GOSR-ip aningaasaqarnikkut Namminersorlutik Oqartussanut attuumassuteqarnera

Ingerlatseqatigiiffik Naalackersuisunit pilersinneqassaaq aamma ingerlatseqatigiiffiup aktiaataanik pilersitsisuullutillu uppersaasuusussanit. Ingerlatseqatigiiffik Namminersorlutik Oqartussanit pigineqassaaq. Inatsisissatut siunnersuummi § 1, imm. 6-imi allassimavoq, ingerlatseqatigiiffik Naalackersuisunut Namminersorlutillu Oqartussanut aningaasatigut akisussaaffiliinngitsumik ingerlanneqassasoq. Aalajangersakkap ilaatigut siunertaraa ingerlatseqatigiiffiup iliuuserisaanut Namminersorlutik Oqartussat aningaasaqarnikkut akisussaatinneqarsinnaanerisa pinngitsoortinnissaa. Naalackersuisut oqaatigaat, aalajangersagaq pisussaaffiliinermut atuilersitsinissamut atatillugu pinngitsoortitsinnaasutut isigineqartoq.¹

§ 1, imm. 6-ip aalajangersagartaa aammattaaq oliemik mingutsitserujussuuartoqarneranut atatillugu GOSR-p aningaasarpassuarnik nalilimmik malersorneqarsinnaanerata

¹ Ingerlatsiviit pillugit inatsiseqartitsinermi akisussaatisinissaq inatsisitigut nalimmassagaaneq ajorpoq pisuni immikkuullarissuni, soorlu ingerlatsiviup piginnittua allaluunniit ingerlatsiviup akiliisinnajunnaartup akiitsuinut akiliisussanngortinneqassagaluarpat. Ingerlatsivimmik piginneqataasoq ingerlatsivimmuut taassumaluunniit suleqatigisaanut taarsiisussanngorsinnaavoq, kisianni taarsiisitsineq taamaattoq akisussaatisinissamut tunngasup imarisaata avataaniippoq. Aktieselskabet pillugit inatsimmi § 1-imi (Pigineqatigiiffiit pillugit inatsimmi § 1-imi) allassimavoq, piginneqataasoq ingerlatsiviup akiligassaqarfigisaanut taamaallaat akileeqaataassutimi naliganik akiliissasoq. Qallunaat inatsisaanni piginneqataasumut akiligassiitsinissamut periarfissaqarunangilaq, taamaallaat pisuni, tamanna inatsimmi erseqqilluinnartumik tunngavissaqartillugu, imaluunniit piginneqataasoq taarsiisitsinissamut akisussaaffiliisumik iliuuseqarpat.

aarlerinaateqarsinnaaneranut atatillugu isiginiarneqassaaq. Tamatumani Aatsitassanut inatsimmi piginnaatitsissummik piginnittuusooq ajoqusernernerut suliffeqarfiup ingerlatsinerani suliaaniluunniit Aatsitassanut inatsimmut ilaatinneqartunit innarliisoqarneratigut aningaasatigut tamakkiisumik akisussaatinneqaraluartoq.

Takorloorneqarsinnaavoq, tamanna pilersinnaasoq, GOSR kisermaassilluni oliemik mingutsitsisoqartillugu upalungaarsimanissamut atortunik atugassiisartuussappat imaluunniit suliffeqarfiit arlaliusut ilaattut taamatut assigusunik oliesiornermik ingerlatsisunut oliemik mingutsitsisoqarneranut atatillugu atugassiisartut ingerlatsinermini malersorneqaratarsinnaasoq. Ajutoortoqassagaluarpat, piginnaatitsissummik tigungminnittup aningaasatigut akisussaaffiliineq allanuttaaqq eqqartuussivikkut tutsinniarsinnaavaa, oliemik mingutsitsinerup annertussusaa ilungersunartuuneralu oliesiornermik ingerlatsiviup kisimi pisuussutigingikkaa aammali allanit sumiginnaasoqarnera pissutaatillugu.

Naalackersuisut oqaatigaat, aktiaatillit aktieselskabet pillugit inatsimmi § 1, imm. 2 naapertorlugu ingerlatseqatigiiffiup pisussaaffiinut akisussaatinneqanngitsut. Taamaattorli Naalackersuisut oqaatigaat, pissutsinik immikkut ittumik takkuttoqarsinnaallunilu pisoqarsinnaasoq, taamaalilluni tunngaviusooq tamanna avaqunneqarluni. Ataatsimiititaliaq isumaqarpoq, tamanna pisinnaasoq, assersuutigalugu ingerlatseqatigiiffiup ingerlatsineranut piginnittoq akuliussimappat, tamatumalu kingunerisimappagu, piginnittoq toqqaannartumik ingerlatseqatigiiffimmik ingerlatsisimasooq.

Taamaattumik siunnersuutip nalinginnaasumik nassuiaatitaani paasinarpoq, Naalackersuisut paasilluaraat, GOSR-imut tunngatillugu aningaasanik nuussuisarnermi periuserineqartartoq nangaassuteqanngitsumik malinneqassasooq, tamanna ingerlatsiviup ukiuini siullerni Namminersortutik Oqartussanit kisermaanqeqluni pigineqaraluarpalluunniit.

Tamanna piffissanngorsorigunikkut ukiut ingerlanerini ingerlatsivimmud piginneqataassutiminnik Naalackersuisut tunisinerikkut ingerlatseqatigiiffiup namminersortunngorsarneqarnissaanik kissaateqarnerannik siunertaq tamanna tunngavissinneqarsorinarpoq, inatsisissatut siunnersuummi allassimavoq, ingerlatseqatigiiffiup aktiaatai 2020-ip ingerlanerani namminersortunut tunineqareersimanissaat, Naalackersuisut angorusukkaat.

Naggasiutigalugu isumaliutissiissutip immikkoortuani matumani oqaatigineqassaaq, Naalackersuisut (aatsitassanut inatsisip §§ 63-69-ani akisussaaffiliinissamut aalajangersagartai nassuiaatitaalu naapertorlugit) mingutsitsisoqarneranut atatillugu, aningaasartuutissatut missingusiaat aammalu upalungaarsimanissamut pilersaarusiut sukumiisut tunngavigalugit saliinissamut pisussaaffiliinerit il. il. pillugit piginnaatitsissummik

piginnittumut qularnaveeqqusiissuteqarnissamik sillimmasiinissamullu annertuumik piumasagaateqarmata.

Cairn Energymut tunngatillugu ingerlatseqatigiiffik ti milliard dollarsit missaanni misiliilluni qillerinissaminut akuersissummik piniarluni qularnaveeqqusiisariaqarsimavoq. Taamaalilluni Nunatta karsia toqqaannartumik toqqaannangikkaluamilluunniit pisumi tassani pisussaaffilerneqanngilaq, qularnaveeqqutit ingerlaannaq oliemik mingutsitsinermi upalungaarsimanermut atortut atorneqarnissaannut atorneqartussaammata, soorluttaaq aamma piginnaatitsissummik piginnittoq erngertumik upalungaarsimanissamat pilersaarummik saliinermillu aallartitsinissamat pisussaaffilerneqarsimasoq. Naak Namminersorlutik Oqartussat oliemik mingutsitsisoqarneranut atatillugu aningaasanut tunngasutigut qulaajaavigineqareersutut Naalakkersuisunit isigineqaraluartut, taamaattoq atuarneqarsinnaavoq, GOSR eqqartuussisutigut malersorneqaratarsinnaasoq.

Takorloorneqarsinnaavoq, GOSR ima eqqartuussisoqarnikkut malersugaatigisinnaassasoq, allaat eqqartuussut ingerlatseqatigiiffimmut ima sakkortutigisisumik kinguneqarsinnaalluni, tamanna ingerlatseqatigiiffiup akiliisinnaajunnaarneranik matuneranillu kinguneqarluni.

2. Siunnersuutip Inatsisartunit siullermeerneqarnera

Oqaatigineqarsinnaavoq, siunnersuutip siullermeerneqarnerani siunnersuutip siunertaasa piviusunngortinnissaat partiit akomanni tapersorneqartoq. Taamaattorli oqaaseqartartunit arlaqartunit inatsisissatut siunnersuutip kingunerisinnaasaatut takorloorneqartut eqqarsarnartoqartutut oqaatigineqarput.

3. Tusarniaanermut akissutit

Siunnersuut Namminersorlutik Oqartussat nittartagaanut ilanngunneqasimavoq makkununngalu tusarniaassutigineqarsimalluni: Kalaallit Nunaanni Politimesteri, Kalaallit Nunaanni Eqqartuussivik, Grønlands Kommando, Grønlandsbanken, Deloitte, Advokatfirmaet Malling & Hansen Damm I/S, Nuna Advokater, Greenland Oil Industry Association (GOIA), Ineqarnermut, Attaveqarnermut Angallanermullu Naalakkersuisoqarfik, Aningaasaqarnermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Nunamut Namminermut, Pinngortitamut Avatangiisinullu Naalakkersuisoqarfik.

Tusarniaaneq 17. januar 2012-imit 17. februar 2012-imut ingerlanneqarpoq. Tusarniaanerup sivisussusia pillugu oqaaseqarnissaq ataatsimiititaliamit pissutissaqarsimaanngilaq.

Ukunanga tusarniaanermut akissutit tiguneqarput:

Anders J., Aalisarnermut, Piniarnermut Nunalerinermullu Naalackersuisoqarfik, Ineqarnermut, Attaveqarnermut Angallanermullu Naalackersuisoqarfik, DMI aamma ARTEK/DTU ataatsimoorlutik, Kalaallit Nunaanni Politimesteri, Grønlands Kommando, KANUKOKA, GOIA, Sulisitsisut Kattuffiat (GA), Sulinermik Inuusutissarsiateqartut Kattuffiat (SIK) aamma Kalaallit Nunaanni Eqqartuussivik.

Naalackersuisut tusarniaavigineqartunik ataasiakkaanik oqaloqateqartarsimanerannit ataatsimiititaliaq tulliuuttuni issugaqassaaq, inatsisissatut siunnersuutip sunniutigisinnaasaanut tunngatillugu itisiliinertut isigineqarsinnaasut.

Issuaaneq aallartippoq”

*KANUKOKA uparuaavoq uuliasiornermut ingerlatseqatigiiffik
pisussaaffilerneqarpoq*

*(uuliasiomermi akuersissummik piginittoq) GOSR-imut isumaqatigiissuteqarlunilu
isumaqatigiissummik malinnissasoq uuliasiornermi sillimaniamennut atatillugu,
uuliasioritseqatigiiffik akuersissummik peqartuusoq uppernarsaasinnaangippat
sullissinermini tunniussinnaasai teknikkikkut aamma akilersinnaasumik
ingerlatsinermi unammillersinnaangitsoq.*

Tamanna ilumoorpoq.

*KANUKOKA uparuaavoq, taamatut aaqqissuussinikkut uuliasioritoq akuersissumik
piginnittoq periarfissinneqarpoq GOSR-imik atuinnginnissaminut,
ingerlatseqatigiiffimmik nunamit allameersumik sillimaniarnermi suliaqartartumik
toqqaasimaguni, tamannami periarfissaasariaqassammat GOSR-i
unammillersinnaasumik ingerlatsivimmik aaqqissuussiniarnerminik
ajornartorsiuteqassappat.*

Tamanna ilaatigut ilumoorpoq.

Tamanna tunngaveqarpoq GOSR A/S nunat tamat assigiissaarutaat pitsaanerpaat malillugu kiffartuussutiminik soorunami sullissisinnaasariaqarmat. GOSR A/S'imik pilersitsinermut siunertaanngilaq suliffeqarfimmik aningaasarsiorfiusussamik ingerlatsinissaq, kisiannili nuna tamakkerlugu uuliamik mingutsitsinissamut upalungaarsimaffimmik aallartitsinissaq, aatsitassanut inatsisip piunasaqatai sakkortuut eqquutsissinnaallugit. GOSR A/S ataatsimut isiginnittumik nunat tamat assigiissaarutaat qaffasissut naapertorlugit kiffartuussutininik sullissisinnangippat, piginnaatitsissummillu pigisaqartup tamanna uppernarsarsinnaappagu, piginnaatitsissummik pigisaqartoq upalungaarsimassutiminik aaqqissuussisinnaavoq

kiffartuussutit pillugit GOSR A/S-imik sullississutit pillugit isumaqatigiissuteqarfiginngikkaluarlugu.

Taamaakkaluartoq GOSR A/S'ip unammilleqatigiinnermi, GOSR A/S atortunik amerlangaatsiartunik Kalaallit Nunaanni inissisimatitassaminik pigisaqarnini pingaaruteqartumik iluaqutigissavaa. GOSR A/S teknikkikkut aningaasarsiornikkullu unammillersinnaanngissusia piginnaatitsissummik pigisaqartup uppersarsinnaappagu, piginnaatitsissummik pigisaqartup ataatsimut isigalugu uppersarsinnaassavaa, atortut assingusumik taama amerlatigisut Kalaallit Nunaanniittut atorsinnaassallugit. Tamanna eqquutsinneqarpat, uuliamik maangaannartitsinermi upalungaarsimaneq isumannaatsoq eqqarsaatigissallugu pingarnerusutut nalilerneqassaaq, GOSR A/S-imik eqqarsaatiginninnissamit salliutinneqarluni. Periarfissat marluk pitsaaqatigiissut akornanni toqqaaneqassappat, piginnaatitsissummik pigisaqartup arlaat isumaqatigiissuteqarfigissallugu nammineerluni aalajangersinnaavaa. Taamaassanngippat pineqartup aalajangersinnaavaa upalungaarsimaneq tamaat nammineq isumagissanerlugu.”

Issuaaneq naavog

KANUKOKAp Naalakkersuisullu akornanni attaveqatigiinneq pillugu ataatsimiititaliap oqaaseqaatigisai

Qulaani ajornartorsiutaasinnaasutut oqaatigineqartut tamannalu pillugu Namminersorlutik Oqartussat KANUKOKA-llu akornanni attaveqatigiittarnerit, ataatsimiititaliap soqutigintartippai. Ataatsimiititaliap ilimagaa, GOSR A/S-imik pilersitsineq aningaasarsiornikkut aamma siunertaqartinneqartoq, taamaalilluni ingerlatseqatigiiffik ataavartumik allisarneqarsinnaalluni siunissami ingerlatseqatigiiffimmik pisiarinnikkusussinnaasunut pilerinarsarlugu. Taamaattoqassanngippalli Namminersorlutik Oqartussanit ingerlatseqatigiiffiup aktiaataanik tunisinissamut siunertarineqartoq taava isumaarutissaaq.

Issuaaneq aallartippoq”

Sulisitsisut Peqatigiiffiat (GA) allappoq, Namminersorlutik Oqartussat uuliamik maangaannartitsinissamut upalungaarsimaffimmi aningaasarsiornikkut peqataanissaa tunngaviusumik akerleralugu, GA'p isummenera malillugu Namminersorlutik Oqartussat inuussutissarsiornermi suliffeqarfiit ingerlanneqartuni naammattumik peqataareermata. Taamattaaq GA allappoq, piginneqatigiiffinnik namminersortunik arlalinnik Kalaallit Nunaanni pilersitsisinnaasunik, pisariaqalissappallu suliassamik isumaginnissinnaasunik peqareersoq.

Ilumorsinnaavoq piginneqatigiiffinnik namminersortunik arlalinnik Kalaallit Nunaanni pilersitsisinnaagaluartunik peqartoqareermat. Ilumoortorli tassaavoq arlaannaalluunniit taamaaliorsimanngimmat, taamallu Naalakkersuisut ilisimasaqarfiginngilaat oliemik mingutsitsisoqarnerani upalungaarsimatitat pioreersut arlaannaalluunniit Kalaallit Nunaanni pilersitsiniarlutik pilersaaruteqartoqarsinnaasunik. Taamaammat tulluartut isumaqarfigineqarpoq, Namminersorlutik Oqartussat taamaattumik pilersitsinissaat, Namminersorlutik Oqartussat atortunik piginneqatigiiffimmik taamaattumik peqataasinnaasumik tunngaveqalernissaq aallaavigalugu. Tamatumani Namminersorlutik Oqartussat suliffeqarfimmik namminersortumik ingerlatsinissamut kissaateqarnerannik tunngaveqanngilaq, pisariaqartitatuulli nalilersuinerit tunngavigalugit nunatsinni upalungaarsimasussanik pilersitsinissaq kissaatigineqarmat. ”**Issuaaneq naavoq**

GA-p Naalakkersuisullu akornanni attaveqatigiinneq pillugu ataatsimiititaliap oqaaseqaatigisai

GA-p Naalakkersuisullu tamatumunnga atatillugu isummersuutigisaannut tapiliullugu ataatsimiititaliap oqaatigiinnassavaa, “najukkami ingerlatsivimmik oliemik mingutsitsisoqarnerani upalungaarsimasussamik” pilersitsisoqarnissaanik tunngaviatigut piumasqaateqartoqanngimmat. Aatsitassanut inatsimmi allassimavoq, oliesiornermik ingerlatseqatigiiffiit upalungaarsimanissamut pilersaarusiussasut. Ataatsimiititaliap paasinninnera unaavoq, tassalu upalungaarsimanissamut pilersaarutit taamaattut nunat tamalaat akornanni ingerlatseqatigiiffiit oliemik mingutsitsisoqartillugu upalungaarsimatitat, oliesiornermik ingerlatseqatigiiffinnut kisitsisitigut paasissutissanik atortussanillu atugassaqartitsinnaasut suleqatigalugit suliarineqassasut.

Issuaaneq aallartippoq”

Greenland Oil Industry Association(GOIA) piffissami siusinaartumi siunnersuut oqaaseqarfigissallugu periarfissinneqarsimavoq, nalinginnaasumillu tusarniaanerup nalaani periarfisseqqinneqarsimalluni. GOIA’p erseqqissaatigaa Kalaallit Nunaanni uuliamik maangaannartitsinissamut upalungaarsimaffimmik pilersitsineqarnissaa inerisaasoqarnissaalu tapersorsorlugu, tamatumalu pitsaasumik suleqatigiissutigineqarnissaa neriuutigalugu, tamannami ataatsimoorullugu akisussaaffiummat tamanullu soqutigisaassalluni, taamaalilluni uuliamik maangaannartitsisoqassappat upalungaarsimaffik taamaattoq qulakkeerneqarsinnaalluni. GOIA allappoq, nunarsuarmik uuliamik upalungaarsimanermit tunngasut pillugit sumiiffinni assigiinngitsuni suliniutinut arlalinnut peqataalluni, kiisalu GOIA’p ilaasortai upalungaarsimanermit tunngasuni annertuumik ilisimasaqartut, kiisalu uuliamik maangaannartitsinissamut upalungaarsimanerup iluani Kalaallit Nunaata suliniutaanik nukittorsaaqataanissaq peqataanissarlu kissaatigigini, tamakkununnga ilaallutik siulersuisunut

ilaasortaasinnaaneq aqputigalugu GOSR A/S'ip inerisarneqarnissaanut peqataasinnaalluni.

Taamattaaq GOIA'p isumakuluutit arlallit eqqaasimavai, tamakkununga ilanngullugit ukiuni arlaqartuni piginneqatigiiffiup uuliamik upalungaarsimanissamut tamakkiisumik periarfissanik pilersuisinnaassanngitsoq uuliamik upalungaarsimanerme piginneqatigiiffiit pilersinneqareersimasut ilutigalugit, taamaalilluni eqqaaneqarluni GOSR A/S maangaannartitsinerme Tier 3-tut annertutigisuni passussinissamut atortunik naammaginantunik pilersuisinnaassanngitsoq. Taamaammat pisuni tamani, pingaartumik siunissami ukiualuit iluanni, uuliamik maangaannartitsinissamut upalungaartitanik allanik saniatigut isumaqatigiissusiornissat pisariaqartinneqartussaallutik. Taamattaaq GOIA'p isumakuluutigaa, GOSR A/S'imik isumaqatigiissuteqarnissamut piumasaqaatit qanoq ilisukkut misissuinissamut ingerlatanik akitsorsaataassanersoq tamakkuninnga kigaallassaataassanersoq.

GOIA'p peqataanissaminik kissaateqarnera kiisalu Kalaallit Nunaanni oliemik mingutsitsisoqarnerani pitsaasumik naammattumillu upalungaarsimanissamut suleqatigiissuteqarusunnera Naalakkersuisut nuannaarutigaat, GOSR A/S-illu inerisaqqinnissaanut GOIA'p soqutiginninnera Naalakkersuisut tikilluaqqunartillugu. Naalakkersuisut isumaqataaffigaat oliemik mingutsitsisoqartillugu upalungaarsimatitat tungaanniit peqataasut tamarmik akunnerminni suleqatigiilluarnissaq pingaaruteqarluinnartutut isumaqarfigimmassuk, tamakkununga ilaallutik sungiusarnissanut ataqatigiissaagassanullu tunngasut. Naalakkersuisut aammattaaq isumaqarput GOIA'p ilaasortai isumannaallisaanikkut qaffasissumik inissisimaffeqartut, oliemillu mingutsitsisoqartillugu upalungaarsimatitat Kalaallit Nunaanni nunarsuullu sinnerani ineriartortitsinermut eqeersimaartumik peqataasut. Soorunami GOIA qaqugukkulluunniit misilittakkaminik tunniussisinnanermiit tikilluaqqunarpoq, Kalaallit Nunaatalu oliemik mingutsitsisoqartillugu upalungaarsimatitaasa suleqataanissaat tikilluaqqunartillugu.

Tusarniaanermut GOIA'p akissutai Naalakkersuisut maluginiarpaat, tassunga ilanngullugit isumakuluutitut eqqaasai siunnersuutaalu. Naalakkersuisut nalilersimavaat A/S'imik Namminersorlutik Oqartussanit pigineqartumik pilersitsineq pitsaanerusoq, oliemik mingutsitsisoqartillugu upalungaarsimasumik Kalaallit Nunaanni inissisimasumik pilersitsinissaq. Tamatumunnga atatillugu Naalakkersuisut ilisimalluarpaat GOSR A/S ukiuni arlalinni sulii oliemik mingutsitsisoqartillugu upalungaarsimasussamik tamakkiisumik

piginnaatitsissummik pigisaqartunut piunasaqaatigineqartut assigisaannik eqquutsitsisunik tunniussisinnaassanngitsoq. Taamaammallu piginnaatitsissummik pigisaqartut upalungaarsimatitanik allanik isumaqatigiissusiorsinnaasut. Tamatumunngali ilutigitillugu Naalackersuisunut pingaaruteqarluinnarpoq, pissuseq tamanna qanoq ilisukkulluunniit piunasaqaatinik sakkortuunik oliemik mingutsitsisoqartillugu upalungaarsimasussanut ullumikkut piunasaqaatigineqartut sakkukillineqassanngilluinnartut.” **Issuaaneq naavoq**

GOIap Naalackersuisullu akornanni attaveqatigiinneq pillugu ataatsimiititaliap oqaaseqaatigisai

GOIA-p tusarniaatitsinermit akissuteqaataani atuarneqarsinnaavoq, Kalaallit Nunaanni oliemik mingutsitsisoqartillugu upalungaarsimasussamik pilersitsiartuaartoqarnissaa kattuffimmit tapersearnartinneqartoq. Isumaqaataaneq tamanna ataatsimiititaliap pitsaasutut isigaa kaammaattuutigissallugulu GOIA’p GOSR A/S-iliulersussami siulersuisunngortussanut ilaasortaanissaminik kissaateqarnera akuerineqassasoq. Aammattaaq GOIA’p tusarniaatitsinermit akissutaani allassimavoq, misissueqqaarnissanut tunngatillugu GOSR A/S-ip aqqissuussaana akitsorsaataasinnaasutut kattuffimmi nalilerneqartoq. Tamanna Naalackersuisut GOIA-mut oqaaseqarnerminni immikkut oqaaseqarfiginngilaat.

4. Apeqquutit

Ataatsimiititaliap siunnersuummik suliarinninnermini Naalackersuisut siulittaasuat Inuussutissarsiornermut Ataatsimiititaliami apersorneqarnissaanik qinnuigisimavaa. Ataatsimiititaliap apersuinermit apeqquutigisaata aammalu Naalackersuisut siulittaasuata akissutaata assilineri isumaliutissiisummut uunga ilanngunneqarput.

5. Ataatsimiititaliap siunnersuummik suliarinninnera

Oliemik misissueqqaarnermit piiaanermullu atatillugu oliemik mingutsitsisoqarsinnaanerata aarlerinaateqarsinnaanera avaqqunneqarsinnaanngilluinnarpoq ilisimavarput. Taamatut pisoqarsinnaanera minnerpaaffissaaniitinniarlugu Aatsitassanut inatsit arlalinnik aalajangersagaqarpoq. Taamatulli ajutoortoqassagaluarpat, aatsitassanut inatsit aammattaaq arlalinnik aalajangersagaqarpoq, mingutsitsisup saliinissaanik saliinermullu tassunga akiliinissaanik pisussaaffiliisunik.

Tamanna tunngavigalugu toqqissisimanarpoq, IBA-mik Carin Energymik isumaqatigiissuteqarnerup malitsigisimammagu, oliemik mingutsitsisoqarnerani upalungaarsimanermit atortunik najukkami uninngasuuteqartoqarsinnaanngornera. Taamaalluta Kalaallit Nunaanni uninngasuuteqarsinnaanngornitsinni Europakkunmut imaluunniit Nordamerikamut upalungaarsimasoqarnikkut ingerlatsivinnik siunissami

ingerlaannaq pisariaqartitsinissaraluarput taamaalilluni annikinnerulissaaq.

Siunnersuutip nalinginnaasumik nassuiaatitaani atuarneqarsinnaavoq, ingerlatseqatigiiffinnik siunissami IBA-mik isumaqatigiissusiortanissani aammattaaq GORS A/S-ip atortuunik annertusaanissaaq Naalakkersuisut anguniagarigaat.

Oliemik mingutsitsisoqartillugu saliinermi atortunik najukkami peqarnissaaq, Namminersorlutik Oqartussat aqutugalugit ingerlatseqatigiiffimmik pilersitsinngikkaluarluni soorunami aamma allatut qulakkeerqarsinnaagaluarpoq.

Ataatsimiititaliali paasinninnera unaavoq, tassalu Naalakkersuisut aaqquissuussinermik taassuminnga toqqaanerat aammattaaq inuussutissarsiornermi politikkikkut siunertaqartoq, kalaallinillu suliffeqarfiutitaartoqarsinnaaneranut ineriartortitsinissamut tunngavileeqataassasoq, oliesiornermi oliemik mingutsitsisoqarnerani upalungaarsimasoqarnikkut pisariaqartitsinermi sullissisinnaasumik.

Taamaalilluni ataatsimiititaliap ilimagisinnaavaa, Naalakkersuisut GORS A/S-imik pilersiterusunnerat inuussutissarsiornermi politikkikkut periarfissanik missuisimanermit tunngaveqartoq, tassalu aatsitassarsiornerup Kalaallit Nunaata aningaasarsiornikkut inuussutissarsiutitigullu ataatsimut ineriartortitsinissamut pilersitsinissamullu tapertarineqarnissaa Naalakkersuisut anguniagassarisaasa atuutilersinnissaat.

Ataatsimiititaliap ilimagisinnaavaa, misissuisimaneq tamanna upalungaarsimanissamut atortunik annertuunik Namminersorlutik Oqartussat tigusinissaannut Cairn Energymik isumaqatigiissuteqarnerat sioqqulluguli pisimassasoq. Isuma tamanna pillugu inatsisissatut siunnersuutip aappassaaneerqarnissaanut Naalakkersuisut akissuteqaamminni uppernarsassagaat ataatsimiititaliap qinnutigissavaa.

5.1 Namminersorlutik Oqartussanut aningaasatigut kingunerisinnaasat

Ataatsimiititaliap maluginiarpa, ingerlatseqatigiiffik suliassaminik sumiginnaassagaluarpat imaluunniit allamik peqquteqartumik eqqartuussivikkut malersorneqalissagaluarpat, Namminersorlutik Oqartussat GORS A/S-imik piginnittutut aningaasatigut akisussaatinneqannginnissaat pinngitsoortinniarlugu Naalakkersuisut inatsisissatut siunnersuut suliarisimagaat.

Taamaattumik tamanna tunngavigalugu ataatsimiititaliaq isumaqarpoq, Naalakkersuisut inatsisissatut siunnersuutip saqqummiunneqarnissaali sioqqullugu inatsisitigut ajornartorsiutaasinnaasut tamakku qulaajaaveqqissaarsimagaat, taamaalilluni Namminersorlutik Oqartussat sutigulluunniit GORS A/S-imik piginnittuunini tunngavigalugu

taarsiivigittinnissamut suliani inissisimaleqqunagu.

Taamaamat ataatsimiititaliap Naalakkersuisut inussiarnersumik qinnuigissavai inatsisissatut siunnersuutip aappassaaneerneqarnissaanut akissuteqaamminni uppersarsassagaat, ataatsimiititaliap tamatumunnga isummersornera tungavissaqarluartoq, aammalu Inatsisartut taamaaliorusukkunik, aningaasatigut naatsorsuutiginnisamik kingunerisinnaasat ernumassutiginagit inatsisissatut siunnersuummut akuersaarsinnaasut.

Inuit Ataqatigiit ilaasortaataat inatsisissatut siunnersuutip siullermeerneqarnerani partiit oqaaseqartartuattut oqaaseqaatimini ilaatigut imatut isummersuuteqarpoq:

”Taamaatoqarnerani inatsisit tungavigalugit Naalakkersuisut akisussaatinneqarsinnaassanersut qulaajaqqunarpoq, tassami paragraf 11 immikkoortuata aappaani Naalakkersuisut atortutut ullutsinnut naleqquttussaanerannut nakkutilliisussaataasut inissisimammata.”

Ataatsimiititaliap Naalakkersuisut qinnuigissavai inatsisissatut siunnersuutip aappassaaneerneqarnissaanut akissuteqaamminni uppersarsassagaat, pissutsit taamaalersinnaanerat inatsisitigut sillimmartaarfigineqarmat, aammalu Namminersorlutik Oqartussat nakkutilliisussatut pisussaaffeqarnertik tungavigalugu atortutut ajutuussagaluarpata akisussaatinneqassanngitsut.

6. Siunnersuutip aningaasatigut kingunerisassai

Inatsisissatut siunnersuutip aningaasaqarnikkut nalinginnaasumik kingunissai Naalakkersuisunit nassuiaatigineqarput. Kiisalu inatsisissatut siunnersuutip aningaasatigut sunniutigeratarsinnaasai ataatsimiititaliap isumaliutissiisummi tikippai. Taamaattorli siunnersuutip aningaasatigut kinguneraa Namminersorlutik Oqartussat ingerlatseqatigiiffiup aallartisarsinnaanissaanut GOSR A/S-imut kr. 500.000-nik aningaasaliissuteqarnissaat.

Inatsisissatut siunnersuutip oliesiornermik ingerlatseqatigiiffiit immikkut ittumik arlaatigut aningaasartuuteqartarnissaannik pisussaaffiliisarnissamut periarfissiinera, akerleriuminaassinnaavoq, naak Naalakkersuisut erseqqilluinnartumik oqaatigigaluaarat, oliesiornermik ingerlatseqatigiiffinnut aningaasatigut iluanaarfiusinnaasoq, najukkami oliemik mingutsitsinermi upalungaarsimanissamut atortunik peqarpat. Oliesiornermik ingerlatseqatigiiffiit tamatumuuna aningaasatigut iluanaarutigisinnaasaat ajoqutaasinnaasunut naapertuussinnaanersut pillugit nalilersuinissamut ataatsimiititaliaq paasissutissanik pisariaqartunik pigisaqanngilaq.

7. Ataatsimiititaliap inassuteqaataa

Ataatsimiititaliap isumaqatigiittup siunnersuutip akuerineqarnissaa inassutigaa siunnersuulli pillugu imaattumik oqaaseqaateqassalluni:

GOSR A/S-ip 2020-imi namminersortunngorsimanissaa Naalakkersuisut angorusukkaat, siunnersuummi allassimavoq. Tamatumunnga atatillugu inatsisissatut siunnersuut najukkami oliemik mingutsitsisoqarnerani upalungaarsimanissamut atortunik atugassaqaarnissap qulakkeernissaata aammalu GOSR A/S-ip namminersortunut tunineqarsinnaanerata akornanni soqutigisat piffissap ingerlanerani allannguuteqarsinnaasut, ataatsimiititaliaq isumaqarpoq.

GOSR A/S-ip ilaannakortumik tamakkiisumilluunniit namminersortunngorsarneqarnissaanut pilersaarutaasut aallartinneqarnissaat eqqarsaatigineqalissagaluarpat Naalakkersuisut pilersaarutissatut periarfissaasinnaasunik taamaattunik Inatsisartunut saqqummiussinissaat Inuussutissarsiornermut Ataatsimiititaliap kissaatigaa.

Inatsisartut Aningaasaqarnermut Akileraartarnermullu ataatsimiititaliaata kiisalu Inatsisartut Inuussutissarsiornermut Ataatsimiititaliaata GOSR A/S-ip siunissami namminersortunngorsarneqarsinnaanera pillugu aammattaaq peqataatinneqartarnissaat Inuussutissarsiornermut Ataatsimiititaliap kissaatigaa.


Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappasaaniigassanngortippaa.



Naaja Nathanielsen,
Siulittaasoq



Kim Kielsen



Aqqaluaq B. Egede



Andreas Uldum



Knud Fleischer



Akitsinnguaq Olsen



Karl Lyberth



Naalakkersuisut Siulittaasuat
Kuupik Kleist
/MAANI

Dato: 9. maj 2012
J.nr.: 01.36.02.03-00076

Greenland Oil Spill Response A/S pillugu apersuineq

Asasara Kuupik

Soorlu nalussanngikkitt Greenland Oil Spill Response A/S pillugu inatsisissatut siunnersuut Inuussutissarsiornermut Ataatsimiititaliamut suliassanngortinneqarnikuvoq. Tassungalu atatillugu ataatsimiititaliap inatsisissatut siunnersuummik suliarinninnerminut atatillugu Inuussutissarsiornermut Ataatsimiititaliami sisamanngornermi majip 17-ani nal. 10.00-12.00 Inatsisartut ataatsimiittarfianni 2-mi apersuinissamut aggersarneqarnissat kissaatigaa.

1. GOSR-imik pilersitsinissaq pillugu

1.a Upalungaarsimanissamut atortunik tigusinissamik takorluugaq kimit kissaatigineqarlunilu suliniutigineqalerpa?

1.b. Nunatsinni oliemik mingitsitsisoqarneranut upalungaarsimasussamik ingerlatseqatigiiffimik najukkami pilersitsisoqarnissaa, piviusorsiornerua pisariaqavillunilu?

1. c. Kalaallit Nunaanni Aatsitassarsiornermi Aningaasaateqarfik pillugu inatsisissatut siunnersuummik saqqummiussinermi, aningaasaateqarfimmut aallartisarnermi isertitarisassatut killigittitap kr. 70. millioninut qaffanneqarneri kiisalu GOSR A/S pillugu inatsisissatut siunnersuutip akornanni toqqaannanngikkaluamik ataqatigiittutut pissuseqarpalunneri Naalakkersuisut akerlilersinnaavaat. Tamatumani inatsisissatut siunnersuutip oqaaseqaatitaani Namminersorlutik Oqartussat IBA aqutigalugu oliesiornermik ingerlatseqatigiiffinnik isumaqatigiissuteqarnikkut oliemik mingutsitsinermi salinissamut atortunik ataavartumik tigusarnissaa piumasaqaatigineqarluni?

1. d. Inatsisartut naatsorsuutiginngisamik siunnersuummik itigartitsissagaluarpata, oliesiornermik ingerlatseqatigiiffinnut Kalaallit Nunaannilu oliemik misissueqqaarnissanut tamanna malunnaatilimmik kinguneqarnerlussinnaanerluni?

1. e. Inatsisissatut siunnersuutip suliarineqameranut atatillugu Nuna oil A/S aperorneqarnikuunerluni? Tamanna pismanngippat, taamatut aalajangersimanermut suna tunngaviusimanersoq ilisimatitsissutiginnissaa kissaatigineqarpoq?

1.f. Akiitsut aningaasaliisarnerlu pillugit iliuusissatut pilersaarummi allaaserineqartunut sanilliullugu pisortat A/S-imik pilersitsineranni malittarisassat allaaserineqartut GOSR A/S pillugu takorloorneqartunut sutigut tulluartinneqarpa?

1.g GOSR A/S pillugu isuma tassaavoq pisortat nuna tamakkerlugu upalungaarsimasumik pilersitsinissamut tunngatillugu aallartisaasuunissaat. Pisortat tunngaanniit inuussutis-sarsiornikkut suliani aallartisaasuunissamik, kingornalu iluatsittumik najugalinnit nammin-ersortunit pigineqalernissaanik isumaq pillugu Naalakkersuisut arlaatigut assersuutaasin-naasumik taasaqarsinnaappat?

2. GOSR-ip ingerlanneqarnissaa pillugu

2. Atortut tunissutisiagut: Sorpiaanuku aammalu sunut atugassaappat? Tamatumani sulia-qartut oqaatigaat mingutsitsineq 3-imik sakkortussuseqassappat akorniamissaa sapissallu-gu allatullu ajornartumik atortunik avataniit pissarsiniartariaqassallutik?

2.a Atuisussat tunngavigisassat qanoq nalilersorneqarpat (akuersissummik pigisaqartut qassit taamatut sullissinermik piserusussasut qanorlu annertutigisinnaaneri qanoq ta-korloorneqarpa?)

2.b Unammillertigisanut qaninnerpaanut sanilliullugu teknikkikkut unammillersinnaassuseq sutigut nalilersuivigineqarpa? Takorloorneqarsinnaanerluni unammillersinnaanerup killeqarnera pissutaalluni GOSR ilaatigut toqqarneqartanngitsoorsinnaasoq?

2.c. IBA-mik isumaqatigiissuteqarnerit aqutigalugit atortunik allanik pissarsinissaq ili-magineqarpoq. Tunissuteqartoqarnissaanut tunngatillugu maannakkut isumaqatiginninniar-nernik ingerlasoqarpa? Sunalu naatsorsuutigineqarpa. Ukiut pingasut tallimat siullit inger-lanerini atortut qanoq annertutigisut sorpiaallu pissarsiarineqarnissaat ilimagineqarpa?

3. Inatsisissatut siunnersuutip inatsisilerinikkut sunniutigisinnaasai kingunissaalu pillugit

3.a. Inatsisissatut siunnersuummi allassimavoq oliesiornermik ingerlatseqatigiiffiit GOSR-mut kiffartuussinermik pisinissaminnut pisussaafilernerqartut. Pisussaaffiliinerup tamatuma oliemik ajutoornersuaqarneranut atatillugu GOSR taarsiisussanngortitaassagaluarpat Namminersorlutik Oqartussanut kinguneqartussaanginnera Naalakkersuisut uppernar-sarsinnaavaat?

3.b Oliesiornermik ingerlatseqatigiiffiit GOSR-imut atuisutut akiliuteqartarnissaannut pi-sussaafeqarnerat inatsisitigut avaqqutaarniarneqarsinnaanerluni taamaalilluni inger-

latseqatigiiffiit Aatsitassanut inatsimmi salinissamut taarsiissuteqarnissamullu akissusaaffimmik avaaqussisinnaallutik?

4. Ingerlatseqatigiiffiup namminersortunngorsarneqarnissaa

4. Ukiuni tallimani siullerni ingerlatseqatigiiffiup niuernikkut suna tunngavigissavaa. Ukiut tallimat qaangiuppata 2017-imut pissaagut tassalu namminersortunngorsaanissamut naatsorsuutigisaq ukiunik pingasunik sioqqullugu?

4.a GOSR A/S-ip namminersortunngorsarneqarnissaanut namminersortunullu tunisinissamut atatillugu najugallit pisisussat salliutinneqarnissaannik piumasaqaateqarpa? Tassami ingerlatseqatigiiffiup pilersinneqarnissaanut nuna tamakkerlugu upalungaarsimasoqarnissamut pisariaqartitsineq tunngavilersuutigineqarmat.

4.b Namminersortoq pisisoq suliffeqarfik matoriarlugu atortut tamaasa nassarlugit as-sersuutigalugu Islandimut Canadamulluunniit nuussinnaasoq, akerlineqarsinnaanerluni.

4.c Inatsisissatut siunnersuummi allassimavoq ingerlatseqatigiiffimmik namminersortunngorsaanissap 2016-imi aallartinneqarnissaa takorloorneqartoq, pisussap tamatuma siusinnerusumi aallartinneqarnissaa periarfissaanerluni?

4.d Kikkut GOSR A/S-imik ukiut arfineq pingasut qaangiuppata (2020-imi) piserusussinnaanersutut Naalakkersuisunit takorloorneqarpat?

Inussiarnersumik inuulluaqqusillunga


Naaja/Nathanielsen
Ataatsimiititaliap siulittaasua



Inuussutissarsiornermut Ataatsimiititaliap siulittaasua
Naaja Nathanielsen
/MAANI

GRL Besvarelse af spørgsmål fra Erhvervsudvalget vedrørende GOSR A/S i forbindelse med Samråd (DOK909725).

16. maj 2012
Sagsnr. 2011-052350
Dok. Nr. 910862

Greenland Oil Spill Response A/S-ip pilersinneqarnera pillugu apequtigisannut qujanaq. Matumuuna Inuussutissarsiornermut Ataatsimiititaliap apequtigisai akiniaraluassavakka.

Postboks 1015
3900 Nuuk
Tlf. (+299) 34 50 00
Fax (+299) 32 50 02
E-mail: govsec@nanaq.gl
www.nanaq.gl

1. GOSR-ip pilersinneqarneranut tunngatillugu

1.a Upalungaarsimanissamut atortunik tigusinissamik takorluugaq kimit kissaatigineqarlunilu suliniutigineqalerpa?

Akissut: Naalakkersuisut sulissuteqartuupput, tassami Cairn inuuniarnermi aningaasaqarnermut tunngasunik isumaqatigiissuteqarnissaq, Impact Benefit Agreement (IBA), pillugu Cairn Energymik isumaqatigiinniarnermut atatillugu 2010-mi Kalaallit Nunaanni Namminersorlutik Oqartussanut upalungaarsimanermut atortussanik annertuunik tunniussaqaqarnissaminut pisussaaffeqalermat. Atortussanik tunniussinikkut siunertaavoq Kalaallit Nunaanni nuna tamakkerlugu oliaarluertoqarnissaanut upalungaarsimanermut ingerlatseqatigiiffimmik piorsaanissamut tunngavissiiinissaq.

1.b. Nunatsinni oliemik mingitsitsisoqarneranut upalungaarsimasussamik ingerlatseqatigiiffimmik najukkami pilersitsisoqarnissaa, piviusorsiornerua pisariaqavillunilu?

Akissut: Naamik pisariaqavissunngilaq, Kalaallit Nunaanni oliaarluernissamut upalungaarsimanermut ingerlatseqatigiiffeqalernissaa. Naalakkersuisummi naliliipput oliamik misissueqqissaarnerit annertuseriarnissaannik ilimasunneq tunngavigalugu pissusissamisuussasoq Kalaallit Nunaanni nuna tamakkerlugu oliaarluernissamut upalungaarsimanermut ingerlatseqatigiiffimmik

piorsaasoqassappat taamaalillunilu nunani allani upalungaarsimanermut suliffeqarfinnik isumalluuteqarneq annikillisillugu.

1. c. Kalaallit Nunaanni Aatsitassarsiormi Aningaasaateqarfik pillugu inatsisissatut siunnersuummik saqqummiussinermi, aningaasaateqarfimmut aallartisarnermi isertitarisassatut killigitap kr. 70. millioninut qaffanneqarneri kiisalu GOSR A/S pillugu inatsisissatut siunnersuutip akornanni toqqaannangikkahuamik ataqatigiittut pissuseqarpalunneri Naalackersuisut akerlilersinnaavaat. Tamatumani inatsisissatut siunnersuutip oqaaseqaatitaani Namminersorlutik Oqartussat IBA aqutigalugu oliesiornermik ingerlatseqatigiiffinnik isumaqatigiissuteqarnikkut oliemik mingutsitsinermi saliinissamut atortunik ataavartumik tigusisarnissaa piumasaqaatigineqarluni?

Akissut: Naalackersuisut siuliini tunngavilersuutigineqartunik oqaatigineqartut erseqqissumik akerlilersinnaavaat.

1. d. Inatsisartut naatsorsuutiginnisamik siunnersuummik itigartitsissagaluarpata, oliesiornermik ingerlatseqatigiiffinnut Kalaallit Nunaannilu oliemik misissueqqaarnissamut tamanna malunnaatilimmik kinguneqarnerlussinnaanerluni?

Akissut: Naamik, Inatsisartut siunnersuut atorsinnaatissanngippassuk tamanna isumaqaannassaaq Kalaallit Nunaanni Namminersorlutik Oqartussat Cairnimit atortussanik 20 mio. koruunit missaannik nalilinnik isertitariumaagassanullu ingerlatseqatigiiffiup akuersissummik pigisalinnit pisassaanik tigusinissamut naaggaarlutik qujaannartariaqarnerat. Tamatumali kingunerissavaa assersuutigalugu angalaqattaartunut umiarsuarnit allanillu oliaarluernernik saliinissatsinnut atortussaqaassanngitsugut. Taamaalilluni ajuusaarnartutut pitsaanngitsutullu nalilertariaqarpoq atortussanik tigusiumanngitsoqassagaluarpat. Oqaatigineqassaartaaq IBA kommuninit attuumassuteqartunit akuerisaammat.

1. e. Inatsisissatut siunnersuutip suliarineqarneranut atatillugu Nuna oil A/S apersorneqarnikuunerluni? Tamanna pisimanngippat, taamatut aalajangersimanermut suna tunngaviusimanersoq ilisimatitsissutiginiissaa kissaatigineqarpoq?

Akissut: Nunaoil A/S allatuulli tamanut ammasumik tusarniaanermut atatillugu siunnersuummut oqaaseqaateqassalluni periarfissaqarsimavoq. Nunaoil A/S toqqaannartumik attaveqarfigineqanngilaq ingerlatseqatigiiffimmi taamatut suliaqarluni oliasiorfiutileqatigiiffiunngimmat taamaammallu oliaarluernissamut upalungaarsimaneq piginnaasaqarfiginagu. Greenland Oil Industry Association (GOIA), Nunaoil A/S-ip ilaasortaaffigisaattaq, siunnersuummik tusarniaavissarsiornermik tigusaqarpoq ilaasortanilu taamatuttaaq Nunaoil A/S sinnerlugit oqaaseqaateqarluni.

I.f. Akiitsut aningaasaliisarnertu pillugit iliuusissatut pilersaarummi allaaserineqartunut sanilliullugu pisortat A/S-imik pilersitsineranni malittarisassat allaaserineqartut GOSR A/S pillugu takorloorneqartunut sutigut tulhuartinneqarpa?

Akissut: Akiitsunut aningaasalersuinernullu ilioriusissani tunngaviit sisamat ukuninnga ilaqarput:

- Aningaasaqarnermut tunngatillugu ineriartorneq

Eqqarsaataavoq GOSR A/S siunissami inuiaqatigiit aningaasaqarnerannut iluaqutaalissasoq misissueqqissaartut ingerlatseqatigiiffiit sulissisarnermigut.

- Aningaasaqarnermik ingerlatsineq attanneqarsinnaasoq

Ingerlatseqatigiiffik inuiaqatigiinnut isertitsissutaasalerumaarsimavoq – tamakku tassaasinnaallutik akileraarutinit isertitat, pissarsiassatut akiliutit, suliffissat allallu.

- Inuuniarnermut avatangiisinullu tunngatillugu piujuartitsinissaq

Ingerlatseqatigiiffiup siunertarissavaa Kalaallit Nunaanni oliaarluertoqarnissaanut upalungaarsimaneq, oliaarluertoqarnerani salineq, oliaarluertoqarneratigut avatangiisinik salineq tamakkunungalugu assingusumik aatsitassarsiornermi suliaqarnek pillugit suliffeqarfimmik ingerlatsinissaq.

- Nuna tamakkerlugu nunallu immikkoortuini ineriartortitsineq

Kalaallit Nunaat taamatut nammineerluni oliaarluertoqarnissaanut ingerlatseqatigiiffeqarnermigut kigaatsumik suliassanik ilisimasaqaleriartorsinnaanngussaaq. Tamannattaq imatut isumaqarpoq nunarput taamaallaat aatsitassaqarneranik misissueqqissaarnernut isiginnaartuinnassanngitsoq kisiannili Kalaallit Nunaat nammineerluni

ikiuutissasoq tamakkunungalu tunngasunik sunniuteqalaarsinnaassalluni. Naak GOSR A/S aallarnisartoqarnerani annikitsuinnarmik peqataassagaluartoq ingerlatseqatigiiffik immaqa siunissami atortussat atorneqarsinnaasut amerliartornerat peqatigalugu niuerfimminik annertusisitsisinnaassaaq.

GOSR A/S Akiitsunut aningaasalersuinernullu iloriusissani pingaarnertut tunngaviusunut tulluarluinnarpoq.

I.g GOSR A/S pillugu isuma tassaavoq pisortat nuna tamakkerlugu upalungaarsimasumik pilersitsinissamat tunngatillugu aallartisaasuunissaat. Pisortat tunngaanniit inuussutissarsiornikkut suliani aallartisaasuunissamik, kingornalu iluatsittumik najugalinnit namminersortunit pigineqalernissaanik isumaq pillugu Naalackersuisut arlaatigut assersuutaasinnaasumik taasaqarsinnaappat?

Akissut: Naalackersuisut apequt paasilluarsinnaavaat tassami inuussutissarsiutinik pilersaarutit iluatsinngitsut tusagassiorfinnit sammineqarneraasarmata. Taamaattoq ingerlatseqatigiiffiit uku taaneqarsinnaapput ullumikkut namminersortunit ingerlanneqartut pigineqartullu aallaqaammullu Kalaallit Nunaanni Namminersorlutik Oqartussanit pilersinneqartut. Ingerlatseqatigiiffiit uku eqqarsaatigineqarput; Pisiffik A/S, Sermit A/S, Grønlandshavnens Ejendomme A/S aamma Nuuk Imeq A/S.

2. Om GOSR's drift

2. Atortut tunissutisiagut: Sorpiaanuku aammalu sunut atugassaappat? Tamatumani suliaqartut oqaatigaat mingutsitsineq 3-imik sakkortussuseqassappat akorniarnissaa sapissallugu allatullu ajornartumik atortunik avataniit pisarsiniartariaqassallutik?

Akissut: Atortussat tunissutigineqartut makkuupput:

Amerlassusii	Suuneri	Model
280x20 m	Sinerissami puttasut siaruarnaveeqqutit	Ro-Clean Desmi Troil Boom Afpu750
14x200 m	Sinerissami puttasut siaruarnaveeqqutit	Ro-Clean Desmi Troilboom GP 750
268x10 m	Sinerissami puttasut siaruarnaveeqqutit	Ro-Clean Desmi Troilboom beach
90	Milluaasut siaruarnaveeqqutit	Arco absorbent boom bale
90	Milluaasut siaartakkat	Arco absorbent pad packs

28	Rope mop skimmer	Ro-Clean Desmi OM140
28	Vacuum system skimmer	Vikoma Mini vac systems
28	Disk skimmer	Vikoma Komara 20
28	Pumperutit	Vikoma Spate pump systems
20	Uninngatitsiviugallartarfiit	Fastanks 10 m3
28	Uninngatitsiviugallartarfiit	Fastanks 7,5 m3
40x1 m3	Kemisk dispergering	Dasic Slickgone NS
150	Kisat	
375	Inunnut illersuutissat	
300	Nivaattat	
300	River	
300	Spande	
50x200	Eqqakkanut puussiat	
75	Puttaqutit atisartakkat	
5	Generator	
5	Kissamik supoorutit	
2	Sakkuutit	
2	Batterinik immiissutit	

Tamakkuuppullumi oliarluernissamut upalungaarsimanermut atortussat assigiinngitsorpassuit puttasunik siaruarnaveeqqutiniit saliissutinut oliarluernernut saliissutaasinnaasut. Taamatutaaq aamma milluaasutut akuutissat (ukiuni marlussunni plusinnaassusillit). Ataatsimut isigalugu atortussat Tier 2-mik annertussutsimut naapertuupput, annertussuserlumi taanna Aatsitassanut Ikummatissanullu Pisortaqarfiup piumasaraa Kalaallit Nunaanni imaani misissueqqaarluni qillerinerni maaniissasoq. 2010-mi 2011-milu misissueqqaarniarluni qillerinerni taamatutaaq Tier 3-mik annertussusillit allaniit timmisartuunneqartussaasimapput isumaqarnarporlu ingerlatseqatigiiffiit GOSR piumannginnaviannikkaat Tier 3-mik atortussat amigaataanerannik pissuteqartumik. Tier 2-mik upalungaarsimaneq Kalaallit Nunaanni imatut isumannaallisaataavoq ingerlaannartumik sunniutilimmik oliarluerneq salinneqalersinnaalluni ungaluneqarsinnaallunilu, tassa Tier 3-mik aniasoqalissagaluarpas ingerlatseqatigiiffik avataaniit ikiortissarsiorariaqassalluni, taamatulli pisoqarsinnaanera Kalaallit Nunaanni misissueqqaarniarluni qillerinerni maannamut pilersaarutigineqartunit allaanerussanngilaq.

2.a Atuisussat tunngavigisassat qanoq nalilersorneqarpat (akuersissummik pigisaqartut qassit taamatut sullissinermik piserusussasut qanorlu annertutigisinnaaneri qanoq takorloorneqarpa?)

Akissut: Akuersissutit 20-upput Kalaallit Nunaata kitaani imaani ikummatissanik misissueqqaarnissamut iluaquteqarnissamullu kisermassisussaataasut aamma 2012/2013-imi Kalaallit Nunaata Kangiani imaani sulii allat 19-it. Taamatuttaaq ukiumi pissutsit nalinginnaatillugit Kalaallit Nunaata imartaani ikummatissanik misissueqqaarnernut misissueqqaarnissamut akuersissutit 20-t missaanniittarput. Minnerpaatut naatsorsuutigineqarpoq kisermaassisinnaalluni akuersissutit tamarmik GOSR-imut aalajangersimasumik sullinneqarnissamik isumaqatigiissuteqarfiussasut soorluttaaq nunarsuarmi allani tamani upalungaarsimanernut ingerlatseqatigiiffinni taamaaliortoqartartoq.

2.b Unammillertigisanut qaninnerpaanut sanilliullugu teknikkikut unammillersinnaassuseq sutigut nalilersuivigineqarpa? Takorloorneqarsinnaanarluni unammillersinnaanerup killeqarnera pissutaalluni GOSR ilaatigut toqqarneqartanngitsoorsinnaasoq?

Akissut: Ullumikkut Kalaallit Nunaanni oliaarluernissamut upalungaarsimanernut ingerlatseqatigiiffinnik peqanngilaq. Arlaat eqqarsaateqassappat suliffeqarfimmik taamaattumik aallartitsiniarluni tamanna inatsimmi sillimaffigineqareerpoq. Pisinnaatitsissutinik pigisaqartut taamaalillutik GOSR-imut isumaqatigiissuteqaratik Kalaallit Nunaanni namminersortut suliffiutaannut taarsiullugu isumaqatigiissuteqarsinnaapput, tassa pisinnaatitaaffinnik pigisaqartut oliaarluernissamut upalungaarsimanernut pilersaarutaat Aatsitassanut Ikummatissanullu Pisortaqarfimmit akuerineqarsinnaagaangata, tassa ilaatigut imaappoq Kalaallit Nunaanni suliffeqarfiup namminersortup atortui oliaarluernermik salinissamut atortunut nunani tamalaani pitsaassusissamik naammassinnissimassappaata. Tamakku § 8, imm. 5, nr. 2-mi takuneqarsinnaapput.

GOSR A/S taamaammat maannakkuugallartoq toqqaannartumik unammillerteqanngilaq eqqarsaatigineqarsinnaasutullu pissuseqarani GOSR A/S-ip piumaneqartannginnissaa. Soorunalimi pisinnaatitaaffeqartut nammineerlutik toqqartassavaat Kalaallit Nunaanni atortussanik taamaattunik pissarsiniarusunnerlutik taamaaliornissaalli piviusorsiortuunaviannngitsutut isumaqarfigineqarpoq.

2.c. IBA-mik isumaqatigiissuteqarnerit aqutigalugit atortunik allanik pissarsinissaq ilimagineqarpoq. Tunissuteqartoqarnissaanut tunngatillugu maannakkut isumaqatiginninniarnernik ingerlasoqarpa? Sunalu naatsorsuutigineqarpa. Ukiut pingasut tallimat siulliit ingerlanerini atortut qanoq annertutigisut sorpiaallu pissarsiarineqarnissaat ilimagineqarpa?

Akissut: IBA-mut isumaqatigiissutit taamaallaat isumaqatiginninniutigineqartassapput qillerinissamik pilersaaruteqartoqartillugu, aatsitassanut inatsimmi inuiaqatigiinnut tunngatillugu piujuartitsinissamik tunngaveqarnissamik piumasqaammut atatillugu. Kalaallit Nunaata imartaani misissueqqissaarluni qillerinissamik maannakkut pilersaaruteqartoqanngilaq qinnuteqartoqarsimananiluunniit, taamaammat periarfissaqarani oqaatigissallugu atortussat suut GOSR A/S-imut atugassanngortissallugit naatsorsuutigineqarnersut. Siunissami IBA-mut isumaqatigiinniarnernut atatillugu soorunalimi misissorneqartassaaq GOSR A/S atortussanik sunik pigisaqarnersoq taamaalereerpallu nalilerlugu atortussat suut pisariaqartinneqarnersut.

3. Inatsisissatut siunnersuutip inatsisilerinikkut kingunerisinnaasai

3.a. Inatsisissatut siunnersuummi allassimavoq oliesiornermik ingerlatseqatigiiffiit GOSR-mut kiffartuussinermik pisinissaminnut pisussaafilerneqartut. Pisussaaffiliinerup tamatuma oliemik ajutoornersuaqarneranut atatillugu GOSR taarsiussanngortitaassagahuarpat Namminersorlutik Oqartussanut kinguneqartussaannginnera Naalakkersuisut uppersarsinnaavaat?

Akissut: Ingerlatseqatigiiffik aktiaateqarluni ingerlatseqatigiiffiuvoq Namminersorlutik Oqartussat ingerlatseqatigiiffiutaat allat assigalugit suliamik ilisimasaqarlutik siulersuisunit allatuulli tunngaveqarluni aamma aktiaateqarluni ingerlatseqatigiiffiit pillugit inatsimmi malittarisassat malillugit ingerlanneqartoq. Namminersorlutik Oqartussat GOSR-ip iliuuserisaanut akisussaataaannissaat (pisussaaffiliinermik naammassininneq) ilimananngilaq allatuulli tunngaveqarneq inatsisillu malinneqartuuartillugit. Tamakku toqqaannartumik takuneqarsinnaapputaaq inatsisissatut siunnersuummi § 1, imm. 6-imi.

Pisinnaatitaaffimmik pigisalik upalungaarsimanermut pilersaarummik suliaqartaannassaaq mingutsitsinernullu tamanut piviusorsioortumik

tungaveqarluni toqqaannartumik akisussaataassalluni. Taamaalilluni pisinnaatitaaffimmik pigisallip isumannaassavaa upalungaarsimanermut pilersaarummi taamatuttaaq pisiniarfigisartakkani nunani tamalaani pitsaassusissat atorneqarnissat.

Pisinnaatitaaffinnik pigisaqartut GOSR-imut isumaqatigiissuteqanngitsoorsinnaapput GOSR-ip sullissineri atugassarititaaluunniit erseqqissumik unammillersinnaassuseqanngippata, teknikimut niuernerimullu tungatillugu, pisinnaatitaaffimillu pigisaqartut tamanna uppersarsinnaappassuk.

3.b Oliesiornermik ingerlatseqatigiiffiit GOSR-imut atuisutut akiliuteqartarnissaannut pisussaaffeqarnerat inatsisitigut avaqqutaarniarneqarsinnaanerluni taamaalilluni ingerlatseqatigiiffiit Aatsitassanut inatsimmi salinissamut taarsiissuteqarnissamullu akisussaaffimmik avaqqussisinnaallutik?

Akissut: Naamik, Kalaallit Nunaanni aatsitassanut inatsit imaluunniit imaani avatangiisit illersorneqarnerat pillugu inatsit malillugit pisinnaatitaaffinnik pigisaqartut akisussaaffii siunnersuutikkut allangortinneqanngillat. Pisinnaatitaaffinnik pigisallit upalungaarsimanissamut pilersaarusiortaannassapput mingutsitsinernullu suugaluartunulluunniit piviusorsiorlumik tungaveqarluni toqqaannartumik akisussaasuussallutik. Pisinnaatitaaffinnik pigisaqartut taamaallaat atortussanik ajornannginnerusumik pissarsisinnaassapput tamakku Kalaallit Nunaanni inissinneqarsimappata sukkasuumillu atugassanngortinneqarsinnaallutik. Tamakkununga akiliutissanik akiliinikkut upalungaarsimanermut mingutsitsinermulluunniit akisussaaffik allangortinneqanngilaq.

4. Ingerlatseqatigiiffiup namminersortunngorsarnissaa

4. Ukiuni tallimani siullerni ingerlatseqatigiiffiup niuernikkut suna tungavigissavaa. Ukiut tallimat qaangiuppata 2017-imut pissaagut tassalu namminersortunngorsaanissamut naatsorsuutigisaa ukiunik pingasunik sioqqullugu?

Akissut: Ingerlatseqatigiiffiup atortuutini ingerlatseqatigiiffimut misissueqqaartunut akilersillugit aallaviatigut atukkiuttartussaavai.

Niuernissamut pilersaarummi inatsisip oqaasertaanut bilagitut ilanngunneqarsimasumi ingerlatseqatigiiffiup suliassai eqqarsaatigalugit eqqarsaatit piviusorsiornerusut ima allassimapput:

”Ingerlatseqatigiiffiup uuliakoortoqartillugu upalungaarsimasussaataasup ingerlatseqatigiiffit allat assigalugit naatsorsuutigaa ikittuinnarnik aalajangersimasunik sulisoqassalluni. Assersuutigineqarsinnaavoq canadamiut ingerlatseqatigiiffiat ECRC, canadap kitaanni sinerianni Canadallu kangisissortaanni tatsinik 60°N angullugu upalungaarsimasussaataasooq arfinilinnillu qitiusunik upalungaarsimaffiuussatut immikkoortortaqartoq immkkortami nataatsimi 7-inik aalajangersimasunik sulisoqarpoq qullersaqarfearlunilu 6-inik aalajangersimasunik sulisulimmik. Kalaallit Nunnaanni ingerlatseqatigiiffik upalungaarsimasussaataasooq ECRC’p upalungaarsimaffittut immkoortuata ataatsip annertoqatigisinnaasavaa, tamannalu ukiuni aggersuni 10-ni piviusorsioortumik anguniarneqarsinnaavoq.

ECRC’p upalungaarsimasussatut immikkortortarqarfiani ataatsimi sulisorineqartunit 7-iusunit atorfiit pineqartut tassaakajuttarput: aqutsisoq ataaseq, allaffimmiu ataaseq, aserfallatsaaliinermik suliallit marluk atorunillu ingerlatsisut pingasut. Tassani pineqanngillat biokemikerit, geofysikerit assigissaalluunniit, atorfilli pineqartut tassaakkajuttarlutik atorfiit upalungaarsimanermik tamakkitsumik ilisimasaqarluartunit inuttalernerneqarsinnaasut aammalu sulisunit teknikkut piginnaasaqarluartunit. Immikkortut pineqartut marluusut Kalaallit Nunnaani pissarsiarineqarsinnaapput aammalu atorfinitsissallugit periarfissaqartussalluni.”

4.a GOSR A/S-ip namminersortunngorsarneqarnissaanut namminersortunullu tunisinissamut atatillugu najugallit pisisussat salliutinneqarnissaannik piumasaqaateqarpa? Tassami ingerlatseqatigiiffiup pilersinneqarnissaanut nuna tamakkerlugu upalungaarsimasooqarnissamut pisariaqartitsineq tunngavilersuutigineqarmat.

Akissut: Ingerlatseqatigiiffiik nunatsinni angerlarsimaffeqarpoq Kalaallit Nunnaanilu akileraartussaaitalluni. Naalakkersuisut massakkuugallartoq immikkut piumasaqaateqarnikuunngillat pisisussanut tunngatillugu kikkut

aammalu piumasaqaatit suut naammassineqarsimassanersut. Tamanna aatsaat pissaaq ingerlatseqatigiiffiup namminersortunngorsarnissaa piareerpat taamaasillunilu neqeroortitsinissamut atortussat sularineqarneranut atatillugu pisisussamut piumasaqaatissat oqimaalutarneqalerpata.

4.b Namminersortoq pisisoq suliffeqarfik matoriarlugu atortut tamaasa nassarlugit assersuutigalugu Islandimut Canadamulluunniit nuussinnaasoq, akerlineqarsinnaanerluni.

Akissut: Tamanna itigartineqarsinnaanngilaq. Tamannali niuerneq eqqarsaatigalugu periuseq eqqumiilluinnassaaq, atortummi immikkoortillugit pisiarinissaat akikinnerungaassammat, atortut nuunnissaat siunertaralugu ingerlatseqatigiiffimmik pioreersumik pisinermi. Upalungaarsimanermi atortut massakuugallartoq amigaataanngimmata, oqaatigineqartutut iliornissaq tunngavissaqanngilaq.

4.c Inatsisissatut siunnersuummi allassimavoq ingerlatseqatigiiffimmik namminersortunngorsaanissap 2016-imi aallartinneqarnissaa takorloorneqartoq, pisussap tamatuma siusinnerusumi aallartinneqarnissaa periarfissaanerluni?

Akissut: Namminersorlutik Oqartussat suliassarinagulu kissaatiginnigilaat ingerlatseqatigiiffinnik namminersortunik ingerlatsinissaq, taamaattumillu namminersorlutik oqartussat taamatut ingerlatsinerat annikilliartortinneqartariaqarpoq GOSR-ip pilersikkiartornera ilutigalugu taamaasillunilu Kalaallit Nunaanni uulimik mingutsitsisoqarsinnaanerani upalungaarsimasussamik ingerlatseqatigiiffimmik pilersitsinissamik siunertaq piviusunngortinneqarluni.

Namminersortut 2016-imit ingerlatseqatigiiffiup ilaanik aatsaat pisinnaalernissaasa periarfissinneqarnissaanut pissutaaqataavoq ingerlatseqatigiiffik Kalaallit Nunaanni uulimik mingutsitsisoqarsinnaanerani upalungaarsimasussamik ingerlatseqatigiiffimmik pilersitsinissamik ineriartortitseqqaarniarmat. Ingerlatseqatigiiffiup pilersinnerani ukiut siulliit eqqarsaatigalugit namminersorlutik oqartussat ingerlatsineq eqqarsaatigalugu aalajangiisinnaatitaasariaqarput imaluunniit piginnittitutum oqartussaasusseqartinneqartariaqarput, GOSR-imi immikkut isiginiarneqartariaqarmat pilesitsinissaq Kalaallit Nunaannilu uuliamik mingutsitsisoqarsinnaaneranut upalungaarsimanissap ineriartortinnissaa. Tamatuma saniatigut namminersorlutik oqartussat piginneqataanissaat

pisariaqassaaq IBA-isumaqatigiisut aqutugalugu atortunik amerlanerusunik
pisinnaanissaq qulaakkerniarlugu.

*4.d Kikkut GOSR A/S-imik ukiut arfineq pingasut qaangiuppata (2020-imi)
piserusussinnaanersutut Naalackersuisunit takorloorneqarpat?*

Akissut: Pissutsit ukiut 8-t qaangiuppata qanoq issanerat eqqoriaruminaappoq.
Naalackersuisut massakkuugallartoq nalilersinnaavaat GOSR A/S
upalungaarsimasussaaitatut ingerlatseqatigiiffinit nunarsuarmi tamaneersunit
soqutigineqarsinnaasasoq, soorluttaaq aningaasaliisussat allat
soqutigisinnaassagaat ingerlatseqatigiiffimmik ingerlalluartumik
sinneqartoorfiusumillu piginneqataanissaq.

Inussiarnersumik inuulluaqqusillunga

Kuupik Kleist